

REGIONAL NEWS BULLETIN

HEADLINES (EVENING)

- 1. Mizoram pumah Chapchar Kut uar taka lawm a ni.
- 2. Governor Gen (Retd) Vijay Kumar Singh-an hmalakna dik, hmanraw tha leh remchanna a awm phawt chuan tun aia nasa in Mizoramin hma a sawn thei a ni, a ti.
- 3. Vawiin khan damdawi mantlawm zawrhna Jan Aushadhhi that zia inhrilh thar ni Jan Aushadi Diwas hman a ni.
- 4. Prime Minister Narendra Modia chuan vawiin khan Dadra and Nagar Haveli leh Daman and Diu-ah hmasawna project cheng vaibelchhe 2587 hu a hawng



CHAPCHARCHAR KUT

Zofate kut ngaihhlut hlawh leh ropui ber, Chapchar Kut chu Mizoram hmun hrang hrang bakah State pawna Mizoram House-ah te hman a ni a. Kumin Chapchar Kut Thupui chu Zonunzemawi Hawihhawmna tih a ni.

Chapchar Kut lawmna pui ber chu Aizawla Sipai Lammualah neih niin, Kut Pa Pu Lalduhoma chuan Mizo pi leh pu te kha mi hawihhawm, aia upa zah leh piangsual hmusit ngai lo an ni a ti a, chumi te thlah chu kan nih avangin tunlai thangthar te pawh, social media hrang hrangah te tawngkam hawihhawm hmang turin a chah.

Chief Minsiter Pu Lalduhawma chuan, Zofa hmun hrang hranga awmte chu taihmak chhuah lehzual theuh turin a chah a, sorkar hnathawk zawng zawng pawhin rim takin hna a thawk mek tih a sawi a. Zofa zawng zawng ten an eizawna theuhah, tih takzet an chhuah theuh chuan he hnam hi a ropui ang, tiin hnam ropuina tur chu taihmak a nih thu a sawi baw.

Pu Lalduhoma chuan Mizo pi leh pute chu aia upa zah mi an nihna chu an hawihhawmna mawi tak a ni tih a sawi a, tunlaiah office hna thawhnaah kum naupang zawkte chu hna sang thawk tam tak an awm tawh avangin hmanlai nun ang zawng zawng chu chhawm a rem lohna chen a awm tih a sawi a, chutihrualin a theihna chen chenah aia upa zahna chu lantir a pawimawh tih a sawi baw.

(Chapchar kut hi mizo ten kan hlut hle a, Aizawlah chuan a lawmna pui ber Sipai Lammualah nimin atang khan hman tan niin Chapchar Kut lawmna thawh

hnihna hi vawiin khan Chief Minister Pu Lalduhoma'n khuallian niin a hmanpui.

Kumin Chapchar kut thupui atan Zonun Zemawi - Hawihhawmna tih hman a ni. Chapchar Kut chhimtu mipuite pawh an thahnem in an hlim hle a, hnam lam leh hnam ziarang hrang hrangte entir niin zai leh lam hrang hrangte hmangin hun hman a ni.)

(Aizawl Sipai Lammual atangin Rodi Lalremruati Zote, Akashvani News Aizawl)

Lammuala hun hmanah hian hnam zia chi hrang hrang tarlan a ni a, cheraw kan a nih bakah hlado chham niin - hnam lam, pipu zai, lemchan, sechhun khuangchawi, pawnto leh chhawnghnawh te bakah hun hlimawm hrang hrang hman a ni.

Chapchar Kut hi mi zawng zawngin an hman theih nan, Mizoram sorkar chuan vawiin hi pisa chawlh atan a puang a, tun kar chhung khan sorkar hnathawkte chu an hnathawhna hmunah hnam thuam inbel turin a lo ti tawh bawh a, hei hian ngaihhlut a hlawh hle a ni.

Districh khawpui zawng zawngah te uar takin Chapchar Kut hi hman a ni a, Lungleiah chuan hmun 2 ah hman a ni a, Thuamluaia Mual ah Minister Pi Lalrinpuii hovin hman a ni a, hetihlai hian Mizo Zaimi Insuihkhawm Pawl leh Mizoram Music Domain (MDM) ten Zomuan Park ah joint meeting neiin a hranpa in Chapchar Kut an lawm bawh a ni.

MZI leh MDM te hian Dist Level Chapchar Kut organiser te nen an thu a inhmuh loh avangin an member te Chapchar Kut lawmnaa zai lo tur a tiin zai lui mi 4 te chu an member nihna paihsak an ni.

Lungleia MZI President Pu P.Lalhmangaihzuala chuan kumina Chapchar kut Organising comtt a telh an nih loh chhan ber chu, Lungleiah zaimi an intodelh a, midang chah luh a ngai lo' ti a an tanna chu ngaitheilo an awm vang a ni thei a ti a ni.

<><><>

GOVERNOR

Governor Gen (Retd) Vijay Kumar Singh-an hmalakna dik, hmanraw tha leh remchanna a awm phawt chuan tun ai hian nasa in Mizoramin hma a sawn thei a ni, a ti.

Governor hian vawiin khan Siaha tlawhin, Smart Classroom project hnuaia ITI Ltd. leh Living Thoughts organisation te'n Numaligarh Refinery Limited (NRL) te Corporate Social Responsibility (CSR) fund kaltlanga an ruahman, Smart Board chu Siaha District chhunga Sikul thlan chhuah 6 te hman turin a hlan a, Sawrkar Department hotute leh zirtirtute a kawm bawh a ni.

Thusawiin Governor chuan zia leh chhiar thiam leh mi taima tamna Mizoramin theihna nasa tak a neih thu sawiin, hmalakna dik a awm phawt chuan tun ai hian nasa takin Mizoramin hma a sawn thei a ni, a ti a. Mizoram sawrkar pawhin thingtlang kilhhawr zawka chengte hmasawn nan theihtawp a chhuah tih sawiin, official-te chu thil thar leh tha zawk, hmasawn nana pawimawhte ngaihtuaha a hnena thlen hreh lo turin a sawm a. Zirna chu exam hmachhawn nan mai nilo, nundan tha leh dik zirna a nih thu pawh sawiin, mipuite chu technology chhuak thar ber berte hlau mai lova hman tangkai tum

zawk turin a chah a. Siaha District chu kimchang zawka tlawh leh ngei a tum thu a sawi bawk.

Prime Minister-in India ram hmun kilkhawr ber bera awmte pawhin ram chhung hmun dangte ruala hmasawnna an hmuh ve zel theih nana hmalak a ngaihpawimawh thu leh, hamthatna leh remchanna awmte pawh an neih zung zung theih nana tanlak a ngaihpawimawh thu sawiin, smart board sem pawh hi thingtlang kilkhawr zawk leh khawpuia cheng zirlaite hmasawnna kawnga intluktlanna tura ruahman a ni a, hei hian zirlaite hnenah zirna tha leh hlawhtlinna a pek ngei a beisei a ni, a ti.

Tanpuina dawngtu te hi Siaha District chhunga Sikul 6- Phura High School, Phura; Z.M High School, Chapi; Border High School, Laki; Siasi Middle School, Siasi; Theiva Middle School, Theiva leh Lopu Middle School, Lopu-te hnenah Smart Board hlan niin, hemi hma hian Lawngtlai District chhunga Sikul 14 ahte hlan a lo ni tawh bawk a ni.



HC JUDGE VISIT KOLASIB

Guwahati High Court Judge, Justice Michael Zothankhuma, Mizoram State Legal Services Authority-a Executive Chairman ni bawk chuan Kolasib Project Veng-a Fast Track Court building sak lai mek chu a hmunah a endik.

Cheng nuai 1799 senga sak mek he Court Building hi September 2022 atanga sak tan niin, Court room 5 leh Judge Chamber 5 awm thei tura ruahman a ni a. Ukil hmeichhia leh mipate tan room hnan ve ve awm thei tura ruahman a ni bawk. Staff hrang hrang room bakah Court-in a ken tel Police leh Excise Prosecution Branch leh room pawimawh dangte awm tura ruahman a ni bawk.

Ruahmanna hmasa ah chuan September 2024 ah a sak hna hi zo tur a inremna zia ani a, rokhawlhna avangin a sak hna hi kumin April thla ral hmaa zo tura in hun pawhsei sak ani.

Chanchinbumite zawhna chhangin, Justice Michael Zothankhuma chuan, Court building sak hna chu a chak tawklo ni a a hriat thu sawiin, hun pawhsei sak kumin April thla ah pawh an thawh zawh hman a rin loh thu a sawi a, Contractor chu tun aia hna thawk chak tur leh hnathawktu pawh lak belh mai se a duh thu a sawi.

He hna viltu Site Engineer pakhat chuan, an hnathawh lai chu za ah 80 an thawk zo tawh niin Chanchinbumite zawhna a chhang ani.

Justice Michael Zothankhuma hi Guwahati High Court Aizawl Bench Registrar leh Kolasib District Court a Fast Track Court Judge Pu R. Vanlalena; PWD SDO leh Kolasib District-a mi pawimawh hrang hrangte, Kolasib District MJA member-te, District Court-a thawktute leh Court building sak lai mek enkawltuten an tawiawm ani.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

JAN AUSHADHI

Vawiin khan damdawi mantlawm zawrhna Jan Aushadhhi that zia inhrilh thar ni Jan Aushadi Diwas hmang a ni a. Mipuiten damdawi mantlawm zawrhna dawрте an pan a, a pawimawh zia an hriat zel theihna tura hmalakna a ni. Pradhan Mantri Bhartiya Janaushadhi Pariyojana (PMBJP) hian a tum ber chu damdawi tha leh man tlawm mi tin ban phak tura chhawpchuah a ni a. He hmalakna thehlar tur hian Union Chemicals and Fertilizers Ministry chuan hapta khat chhungin kawng hrang hrangin hun a buatsaih a ni.

Prime Minister Narendra Modia chuan a thuchahah Aushadhi Diwas chu mipuiten damdawi man tlawm leh tha an hmuh theih nana sawrkar theihtawp chhuah zia tilangtu a ni a ti a. Pu Modia chuan ramchhung kil tinah damdawi tha a thleng phak tawh tih sawi bawk a ni.

Union Health Minister JP Nadda pawhin Janaushadhi Diwas puala a thuchahah ramchhunga Jan Aushadhi Kendra sing 1 sang 5 chuang din anih tawh thu a sawi a. Nitinin mi maktaduai chuangin an chhawr tih sawiin damdawi dawr dang aiin zaa 50 atanga 90 laiin a man a tlawm zawk tih a sawi bawk a ni.

<><><>

UNION HM

Union Home Minister Amit Shah-a chuan Tamil tiamin tualto tawng regional language ti hmasawn zel turin sawrkarin theihtawp a chhuah a ti. Vawiina Tamil Nadu-a Ranipet district-a Central Industrial Security Force (CISF) din cham 56-na a hmanpuinaah he thu hi sawiin Pu Shaha chuan Tamil Nadu state ziarang leh hmun hluite humhalh a tul tih a sawi a. Prime Minister Narendra Modia chuan Tamil tawng leh hnam ziarang hlui tawh takte chu vawng nung tlat turin theihtawp a chhuah tih a sawi bawk a ni.

<><><>

PM

Prime Minister Narendra Modia chuan vawiin khan Dadra and Nagar Haveli leh Daman and Diu-ah hmasawwnna project cheng vaibelchhe 2587 hu a hawng. Thusawiin PM Modia chuan Dadra and Nagar Haveli leh Daman and Diu te chu ram rohlu an nih thu sawiin sawrkar laipui chuan state dangte entawn tur khawpin hmasawwnna huapzo kalpuiin theihtawp a chhuah a ti a. Silvassa-a hawwna inkhawmah Pu Modia chuan hmasawwnna ruhrel, inkalpawhna, healthcare, zirna leh tourism lamahte Dadra and Nagar Haveli te chuan hmasawwnna nasa tak an neih thu a sawi a. UT hotuten social security scheme te tha taka an tihlawhtling chu lawmawm atih thu a sawi bawk a ni.

<><><>